



PROGRAMMA

LVK FINALE 2013

Stichting LVK en L1 organizere i.s.m. V.V. De Hopsjlokkers oet Zjwame

LVK FINALE

JO GERRISHAL • MAASNIEL

01 | 02 | 2013



Mit dank aan óse sjponsors! V.V. De Hopsjlokkers Zijwame



studiodone

DTP- en Ontwerpstudio Nikkessen ■ www.studiodone.nl

Consider it done!

Rabobank



LVK - FINALE ZJWAME

JO GERRISHAL NEEL

2013

VRIEDIG 1 FIBBERWARIE

PRISSENTASIE: HENK HOVER

Samesjtelling: Jos Cremers, Sjtichting LVK
Drök: Schrijen-Lippertz
Omsjlaag: Maureen Nikkessen, Studio Done



Het Limburgs Volkslied

'Limburg mijn Vaderland'

Waar in 't bronsgroen eikenhout
't nachtegaaltje zingt;
Over 't malse korenveld
't lied des leeuweriks klinkt
Waar de hoorn des herders schalt
langs der beekjes boord


refrein:

***Daar is mijn Vaderland
Limburgs dierbaar oord!
Daar is mijn Vaderland
Limburgs dierbaar oord!***

Waar de brede stroom der Maas
statig zeewaarts vloeit
Weeldrig sappig veldgewas
kost'lijk groeit en bloeit
Bloemengaard en beemd en bos
overheerlijk gloort

Waar der vaad'ren schone taal
klinkt met held're kracht
Waar men kloek en fier van aard
vreemde praal veracht
Eigen zeden, eigen schoon
't hart des volks bekoort

Waar aan 't oud Oranjestraat
't volk blijft hou en trouw
Met ons roemrijk Nederland
één in vreugd en rouw
Trouw aan plicht en trouw aan Geus
heerst van Zuid tot Noord





Jan Derijk (zanger Limburgs Volksleed)



VEURWOORD VEURZITTER SJTICHTING LVK

De letste editie van de LVK finale in Mergraote heet veul tongen losgemakt. Of het nau ging euver het onsportieve boe geroop veur de drie voudig winnaar **W-Dreej** of euver de jes die men nao aaflaup neet mier kos truuk vinge, iedereen vong er wel get van!

Det waas auch de reeje veur het bestuur um de meining van het Limburgs volk euver het LVK ins waat oetgebreider te gaon onger zeuken. Die enquete hebben wae veur de zomervakantie oet gezat. Veul minse hebben dao op gereageerd. Verreweg de mees- te minsen leete os weten det ze het ins zien met het reglement en de invulling van het konkoers. Mer der waare auch suggesties um een aantal dinger anders te gaon doon. Dao hebben wae raekening mit gehauwe Zo kan der veurtaan mer 1 stum per sms of per bon oetgebrach waere.

Op het gebied van veiligheid en logistiek hebben wae auch maatregelen genomen. Gewoen um er- veur te zorgen dat in de toekoms alles veilig en

soepel blief verlaupe. De aafkorting van veilig en soepel is VS en oud-president Bush van de VS waas eine kier te gast in Mergraote, ziene opvolger Obama heet zeker auch aan de LVK finale in Mergraote gedach wie hae reep: Jes we can! 'We can' der zeker wer eine schoene finale van gaon maken dit jaor.



Joep Verbugt

Deze kier zien we te gast bei De Hopsjlokkers oet Zjwame. Ein vereniging mit ein geschiedenis die teruk geit nao 1952. Met hiel veul enthousiasme hebben ze zich veur de organisatie van de finale bei os gemeld en zien ze vervolgens hiel druk in de weer gewees um alles tot in de puntjes veur te bereiden. Wae hebben der alle vertrouwen in det det hun good gelukt is.

Helaas waas het neet meugelik ein geschikte lokatie in Zjwame zelf te vinge. Vandao det wae oetge- weke zeen nao Remunj, nao de Jo Gerrishal. Ein bekende LVK lokatie wao wae al ierder zien gewees. Net as veurig jaor zien wae gestart met 237 leedjes. Nao dreej prachtige halve finale rondes die wae al-

Iemaol via L1 radio en Tv hebben kinne volgen zien der 19 finalisten euver gebleeven. En die gaon allemaol vanaovend mitdoan um de hoegste limburgse vasteloaves-ier te gaon behalen. Ich wins ze hiel veul succes en ich dank De Hopsjlokkers en al heur vriewilligers, sponsors, L1, de bonnentellers, de juryleden en de rest van de bups veur al det werk.



Laote wae der samen van gaon geneete!
Laot het eine aovund waere die wer alle tongen losmakt... mer dan van het zinge van al die biesongere muzikale Limburgse vasteloaves juweeltjes.
Wae gaon aan de geng... en wae hauwe op de kis umdet der veur de 37e kier ein LVK finale is.

*Joep Verbugt,
Veurzitter LVK*



SJTICHTING LVK

't Besjtuur besjteit oet (op de foto van links nao rechts):
Joep Verbugt • Erik Brouns • Jan Volleberg •
Stan Spauwen • Ron Aspers • Hilde Bremmers •
John Habets • Elise van Wordragen • Jos Cremers
Posbös 1625 • 6201 BP Mestreech
info@stichtinglvk.nl
KvK nr. 41071309 • Bankrek. 17.05.28.111

Veurwaord Veurzitter Sjtychting LVK 2013 Zjwame,

Bèste vastelaovesvrunj,

't Is zo wied, 1 fibberwarie 2013. De Vastelaoves Vereniging 'De Hopsjlokkers' oet Zjwame hèt uch van herte welkóm op 't LVK 2013. 't Is ós ein heel grote eer óm deze finale-aovendj van 't LVK te moge organisere.

Väöl maondje aan veurbereijinge zin hiejaan veuraafgegange, mer nao det tillefoontje van Joep Verbugt: "Marcel, ich moog uch felisitere..." ging alles in sjneltreinvaart. Ein groot aantal, wo-ónger ós besjtuur, ós kemissieleje, ós eige leje, mer zeker dae hele grote groep vriej-willigers oet Zjwame en ómsjtreke haet zich daonao toet noe toe de bein ónger 't lief oetgerend óm alles op tied klaor te kriege. En vanaovendj sjtaon v'r ouch veur uch klaor óm uch te verzeen van ein of meer pilskes of fris, en... natuurlik veur get te aete.

Vanaaf dees plaats wille veur den ouch ei waord van dank en waardering oetbringe aan alle miense die dit LVK toet ein suukses gaon bringe. Veur zin den ouch greuts op ós eige Zjwame want: "Hiej löp 't".



Marcel Verheyden

Ouch wille veur alle 19 finaliste perfisiat winse mit 't behaole van de finale, sjapo. Dit mó't al aanveule es ein geweldige euverwinning, mer vanaovindj gaon v'r same bepaole waem van dees 19 sjtrakkes mit de Bertha Paulissen Baeker nao hoes geit en natuurlijk

mit de eer en de ewige roem van 't Bèste Limburgse Vastelaovesleedje van 2013. Suukses allemaol.

De LVK 2013 Finale Aovendj; ein van de grootste vastelaovessjpiktakels van ós Limburgs Landj.

Ein heppening wobiej jónk en aad, diek of dun, oet noord-, midde- of zuid Limburg; rood, geel of greun; same mit idderein kèn genete van ei geweldig sjtökske vastelaovendj.

Dankzij de sjoon samewèrking mit Stichting LVK, L1 Radio en TV en alle euverige LVK-partners is dit toet sjtandj gekómme en mede ouch door de sjteun van alle sjponsore kènne v'r noe al sjpraeke van eine gesjlaagde aovendj.

Rès mich nag, uch allemaol names Sj'tichting LVK 2013 Zjwame eine sjentig sjone aovendj toe te winse, mit vööl lol en plezeer. Ammezasie.

LAOT GAON DAE WAGE.

*Veurzitter Stichting LVK 2013 Zjwame,
Marcel Verheyden*



Beste LVK-leefhebbers,

Hoeëge buim

Weej van W-Dreej zien opgegreujd en groeët gewaore met 't Limburgs Vastelaovesleedjes Konkoer. Idder jaor waas 't weer nagelbiète; gunne de houfjury en 't volk ós ein plaats in de finale? Ós ièrste inzending in 2003 met 'Höf de glazer in de lóch' resulteerde meteen in ein veerde plaats. Gater hebbe we in de lóch gespróng. En zeker, ouk W-Dreej haet daonao waal ens op einen aos mótte houwe. Ut is valle en opstaon, succes kump neet vanzelf aanweije. Bietje beej bietje zien weej nao baove geklomme, met gedöld is d'r steeds weer gesleuteld aan nije tekste en melodieje. Det wachte en volhalde is oétintelik beloeënd met dreej óngeluiflikke euverwinninge op ein riej. Maar ja, hoeëge buim vange vuuël wind. De negatieve reacties nao de finale in Mergraote hebbe bes waal pien gedaon. Ouk de minse die zoeë hard gewerk hebbe um 't LVK te organisere hadde zo'nne aafloop neet verdeend. Binne W-Dreej haet idder 't op zien eige wiès verwerk. Quinn schreef 't van zich aaf in 't nije W-Dreej-leedje 'In 't land van de Maasvallei', Christel zingk 't leever van zich aaf en zóch samewerking

met 't zuuje en Hay trok zich op aan de succesvolle optraejes en gooje reacties.

Ut LVK is en blief in ós ouge ein prachtig spel. De wedstrièd haet in de ganse provincie de aafgeloupe 36 jaor vuuël minse bewaoge um de meis oéteinloupende vastelaovesleedjes te schriève. Ut LVK haet d'r volges ós ouk veur gezörg det vuuël vastelaovesvereniginge eur eige lokale leedjeskonkoerse serieuzer zien gaon neme. Ut LVK haolt dus neet 't slechste oét schrièvers nao baove, 't vergruuët juus de muzikaliteit in ós provincie.

W-Dreej wins de Stichting LVK, CV De Hopsjlokkers oet 'Zjwaame', L1 en alle finalisten en toeschouwers in de Jo Gerrishal venaovend enorm vuuël plezeer en succes.

Christel, Hay en Quinn van W-Dreej.



Ik bin vastelaovend

Ik bin det pekske in de kast, det kump d'r oet en neet mier pas
Ouk dae confetti op de sträöt en träöt heej in de maot
Ik bin dae Prins dae reup alaaf en veul mich greuts en gaaf
En ouk det leedje desse zings , dae sies aan wae se dinks

Refrein

Ik bin de vastelaovend, gans Limburg druimp van mich
Mien roeëd geel greune kleure, dae schminck, det bliej gezich
Zit vol met schaele wazel en zing d'n hoegsten toen
Veur vraemde neet te vatte, veur mich toch hiel gewoeën
Ik bin de vastelaovend , gans Limburg oet zien bol
Heb ouk de meeste vrinde, mien facebook sleit op hol
Dus wilse waat belaeve, dan sloet dich beej mich aan
Dan gaon weej met zien alle d'r waer lekker taegenaan

Ik bin d'n optoch dae heej trek, dae jong beej pap op ziene nek
Ik bin dae kloon dae veur dich steit, met dich zien daak oet geit
En ouk d'n ober aan d'n tap , ut kraegske det ik hap
Ik bin de vastelaovend zelluf , begôs op elluf van elle

Oetveurende: **Roy van den Broek**

Teksdichter: *Frank van den Broek*

Compenis: *Hay Geritz*

Plaats: *Blierik*

LVK01



De Vastelaovesheld

Refrein:

*Ich bën de held van de vastelaovend
ich raos, ich vleege, ich plek
van de mörge tot de aovend
bën eine echte, échte, vastelaovesgek
En vleege ich mit die daag nao boete
mit mien masker en mien keepke aan
zèt aoep al die caféroete
anges knal ich mich der taegeraan!
Ich vleege noe hie, en dan weer dao
ich vleege mich zellef achternao*

Mit vastelaovend bën ich neet te houwe
en mein ich dat ich alles kèn
In mien glad gestreeke pèkske
veul ich mich eine Superman!
Ich vleege door rwoad gael greune straote
en af en toe dan vleege ich oet de boch
Toch kèn ich 't ech neet laote
mit al dae vastelaovend in de loch

Mit vastelaovend weit ich neet van stoppe
De tied dae liek waal stil te staon
Spiderman dae bliet weer plekke
ich weit jao neet van heives gaon
En vènj ich dan 't sleutelgaetje
haet deze held 't weer gered
en fluuster ich taenge mien maetje
diene Bètman dae kump noe noa bët!

Klink in oos riek de allerlètste kjèr alaaf
Dan zèt ouch ich mien heldemaskerke weer aaf!
Alaaf!

Oetveurende: **Wim en Loe**
Teksdichter: *Loe Hameleers*
Compenis: *Huub Lemmens*
Plaats: *Stein*

LVK02



Eh?... Lalala

Refrein:

*De vastelaovendj?.. la la la la
La la la la, ich weit neet waât
De hieële aovendj?.. la la la la
La la la la, tot 's aoves laât
Want waat d'r met die daag gebeurdj
Daoveur zeen gaar gein weurd
De vastelaovendj?..la la la la
La la la la tot 's aoves laât*

D'r waas ein leedje, woeë in woord beschreve,
Woeë vastelaovendj zich òm dreitj,
De tekst is mich helaas neet biê gebleve,
Ich weit neet zjust mieër wie det geit,
Al zing ich det de hieële tiêd,
De meiste weurd, die bin ich kwiêt

Ich wil d'r neet mieër euver lemmenter
Dan krieg ich last van mien gemood
Dich met de vastelaovendj ammezere,
Löktj sònger weurd toch aeve good
Wie jaomer detj misjien ouch is
Die weurd die waere neet gemisj

Oetveurende: **Men in Pek**

Teksdichter: *Peter Jansen & Wim Janssen*

Compenis: *Peter Jansen & Wim Janssen*

Plaats: *Rooj*

LVK03



Ik bin genne boer

Refrein:

*Ik bin genne boér mâr unne cowboy
Met vuël kuu twieë verkes en unne farm
Ik bin genne boér mâr unne cowboy
Mien vrouw det is mien wife die hilt mich warm
Ik bin genne boér mâr unne cowboy
Mâr met de vastelaovestiéd
Springe mien kuu wir oét d'n band
Weare mien verkes adjudant
En bin ik vâ de ganse stal Prins Carnaval*

Ik bin mien ganse leave boér gewes
En wets se; det zaot ni altiéd mei
Ik werd in daen tiéd nogal vuël gepes
Met mien werk, mien verkes en mien boerderij
En ok de vrouwluuj die vonde det naet stoer
As ze vroege "wat vur werk duis dich" en ik reep Boér
Dus toen wis ik heej mót ik wat aan daon
En sinds daen tiéd stoan ik stevig in mien schaon
Want...

Nouw zit ik de ganse daag op mien paerd
En drièf mien kuu zoeë doeën beejein
Mien rubber laarze die zien vâ ech leer
Op miene kop enne cowboyhood dae zit mich fijn
En ok de vrouwluuj die vônde det wal bes
Âs ze vroege "geis se met mich mei" en ik reep Yes!
Sinds daen tiéd is 't drukker op mien farm
En mien bed jao det is nouw dukker warm
Dus...

Oetveurende: **Boer Jan en zien cowboys**

Teksdichter: *Peter Theelen*

Compenis: *Peter Theelen*

Plaats: *Velde*

LVK04



Dao bun ich met gebaore

Vastelaovendj zitj bie ós van binne,
zitj ós in de gene, zitj ós in ut blood..
Dao zeen we mét gebaore

Refrein:

Vastelaovendj zitj ós in de gene

Vastelaovendj zitj ós in het blood

Drie daag fiëste en tapiëste en d'raan wie verkeswullem

Vastelaovendj zit ós in het blood

Un moes hildj van kiëës, unne knien hildj van maore
Mer ich van vastelaovendj, dao ben ik met gebaore
Unne uul hildj van zien kerk, unne valk van ziene taore
Mer ich van vastelaovendj, dao ben ik met gebaore

Een eándj hiltj van mik, unne kaorewolf van kaore
Mer ich van vastelaovendj, dao ben ik met gebaore
Un kniepkat hildj van kniepe, unne speurhondj hildj van spaore
Mer ich van vastelaovendj, dao ben ik met gebaore

Un vleeg hiltj van huijp en un muk die hildj van aore
Mer ich van vastelaovendj, dao ben ik met gebaore
Mien mam hildj van mien pap en mien pap van jónge klaore
Mer ouch van vastelaovendj doa zeen zuu met gebaore

Oetveurende: **Hoondervel**

Teksdichter: *Frits jr. Criens*

Compenis: *Bart Storcken*

Plaats: *Hale*

LVK05



In de Wolke

Terwiél ut, eiketske zien good bewaarde neutjes it
Vleege de vastelaovesnote door de lôch
En dae muziek dae makt get los wie idderein hej wit
Dan zien drei kleure en gelök neet wiet gezoch
Want alle langverwachte druime kome oét
Doe brings de lach wer op mien snoét!

Refrein:

*As se mich zeuke, zeg dan det ich in de wolke bin
Straolend zunke, grotste sjat van mich
As se mich zeuke, zeg dan det ich in de wolke bin
Want veurluipig bin ich dao neet wig
Bis miene leeve, doe luts mich zweve
Hiel de boék zit vol mit vlinderkes bej mich
Wil same laeve en alles gaeve
Bin in de wolke... allein door dich*

Ich kin bej plentjes boéte amper nog de knupkes zeen
Toch bleujt d'r binne al volop get tusse ôs
Same sjoenkele wae door de vastelaovend heen
Zôn prachtig blumke laot ich zeker noëit miër los
Hoteldebotel bin ich, dinke geit neet miër
Doe gufs mich vleugels kiër op kiër!

Mit vastelaovend kin ut dus inins gebeure
Zoë oét ut niks wurse door eemes blej verrast
Gelök det vingse auch al kin ut efkes deure
Want idder pötje heet un dikselke det past

Oetveurende: **De Breurkes**

Teksdichter: *Mark van Mullekom*

Compenis: *Mark van Mullekom*

Plaats: *Kepel*

LVK06



Höbs doe ouch zo'ne zin

Refrein :

Höbs doe ouch zo'ne zin óm te danse?

En kèns doe neit sjtil blieve sjtaon?

Höbs doe ouch dat gevuil óm te sjanse?

Dan kóm mit ós mit en laot gaon.

Mit die hendjes wènke en rammele mit die sjènke.

Veer sjtampe oppe maot, de klinkesj oet de sjtraot!

't Ganse jaor lank mòste wachte,

D'n tied dae vlug mer neit óm.

Mit de vastelaovend al in gedachte,

Heurs doe dae sjlaag op die tróm?

Dan sjtaon veer hie, zie aan zie

en sjókkele veer mit die prie.

Nemes hilt òs meer bie!

Dae Sinterklaos is al lang pleite,

De Krisman zeen veer al kwiet.

En de nuje prins dae löp al te zjweite,

Noe zeen veer bienao zowied.

Dan sjtaon veer hie, zie aan zie

en sjókkele veer mit die prie.

Nemes hilt òs meer bie!

D'n optoch vol patsje en vaere,

Kepèlkes trèkke al langs.

En veer gaon ós hie neit lang meer vervaele,

Alaaf, veer griep e ós kans.

Dan sjtaon veer hie, zie aan zie

En sjókkele veer mit die prie.

Nemes hilt òs meer bie!

Oetveurende: **Cyrille Niël**

Teksdichter: *Sjohn Smeets*

Compenis: *Gian Prince*

Plaats: *Zitterd*

LVK07



't Verlange

refrein:

*Vea hebbe det verlânge,
um d'n hieëmel te behânge
Mét klokke, sterre, doêzendj belle,
veule os herte weer versnelle
Want 't ès weer begonne,
gaef os slingers en ballonne
zweeve aan dae boonte tros,
aswoonsdig laote vae ze los*

Verlange gieet weer grujje, als minse op goan blujje
Wi-j bloome bont beej-ein geboonge.
als boekette in de straote, alle vorme alle maote,
dies leefdje es zoeë vaak bezoonge.
Vae zeen ze same koame, dus kinne vae be-aome;
Schoeën bloome loate zich good minge,
roektj de geur van 'geine stress', ut es echt un laeves les,
dies boedschap kome vae uch breenge.

Vae zeen in hoeëger sfeere, goan os same ammezeere
't Keumtj doeër det pallet aan klouëre.
vae raake boete zinne, gaon umërme en beminne,
d'r stieët van alles te gebuuëre .
Haotj os good inne gate, vae zeen in alle state,
um in dieëze sfeer te bliëve hânge.
vastelaovendj veer ich heej, 't gieët vól te gaw vörbeej,
Waat oeëver blijftj és det verlânge.

Oetveurende: **Ronald en Carien**

Teksdichter: *Ton Wolter*

Compenis: *Ton Wolter*

Plaats: *Wieërt*


LVK08



Pappa Mamma

Refrein:

*Pappa mamma mamma mia mammi amore
án vâstenaovend heb ik mien hárt verlaore
drie daag lang dán is met meej álles paletti
en 't raegent aoveraal confetti
't moëiste wát meej oëits is aoverkome
't moëiste wát ze oëits hebbe bedocht
Pappa mamma mamma mia mammi amore
ik heb mien hárt án vâstenaovend verlore*



Ós pap en mam die hebbe meej 't álmaol beej gebrocht,
met de pappe-laepel is 't ín-gegaeve
Dörrum dát ik mien hárt án vâstenaovend heb verknocht,
dát is en blieft nou vort mien gânse laeve
't Állermoëiste wát 't gaeve ka
kóm zing met ós nou deze'n aria

Iets schonders heb ik in mien laeve noëits ni meigemákt,
vâstenaovend zal ik aalzelaeve viere
Din dát haet oêtgevóngen, jao din haet meej wál gerákt,
di zudde met en standbiëld mótte iere.
Misschien keumt dát d'r oëits nag wál is va
kóm zing met ós nou deze'n aria

Oetveurende: **Thijssen en Co**

Teksdichter: *Thijs Kleeven & Cor Kuipers*

Compenis: *Thijs Kleeven*

Plaats: *Haors*

LVK09



Murge blief ich Thoes

Refrein:

*Murge blief ich thoes
Al duujse tien kier op de bel,
al steurse mich ein joekskapel
Ich aet de sleutel van mien hoes
Jao, murge blief ich thoes
Mer as ut murgevreug is,
is ut eigenlijk vandaag
Dus waem den nog neet meug is,
haet nog eine ganse daag
Den lach ich in mien voes
Jao, murge blief ich thoes*

Ich höb mich wies gemaak, det as ich ins verzaak,
de ganse vastelaovendj neet mier door kin gaon
Noe bön ich altied bang en blief ich extra lang
Want as ich gaon den is ut fiést vöör uch gedaon

Miense neume mich de held
Mer ich höb ze dit verteld

Ich Höb get slums bedach, en onger os gezag
Ich dink det ich vöörloipig blieve plekke kin
Want hiej veul ich mich thoes, dit is mien twiëde hoes
Dus den haet weg gaon mit dees daag toch gaar gein zin

Ich bön zoe blie det ich ut snap
Dus noe roop ich vöör de grap

Ich kin ut mer neet snappe, det ut stopt as ich neet gaon
Dus blief ich altied stappe, zoedet ich neet stil blief staon

Jao murge, jao murge,
of äövermurge, of äöver-äövermurge,
jao oeits den blief ich thoes.

Oetveurende: **Óm in te Lieste**

Teksdichter: *Bas Keltjens*

Compenis: *Niek Dirkx & Jo Huijnen*

Plaats: *Naer*

LVK10



Scoreformulier Finale LVK 2013

			Hoofjury LVK	Awt-finaliste-jury	Muzikantejury	Vastelaoves-jury	SMS/Tillefoon	Totaal	Plaats
	In volgorde van optreeje:	Plaats	Jury1	Jury2	Jury3	Jury4	Jury5	pnt	
1	Ik bin vastelaovend	Blierik							
2	De Vastelaovesheld	Stein							
3	Eh ?...Lalala	Rooj							
4	Ik bin genne boer	Velde							
5	Dao bun ich met gebaore	Hale							
6	In de Wolke	Kepel							
7	Höbs doe ouch zo'ne zin	Zitterd							
8	't Verlange	Wieërt							
9	Pappa Mamma	Haors							
10	Murge blief ich Thoes	Naer							

Scoreformulier Finale LVK 2013



			Hoofjury LVK	Awt-finaliste-jury	Muzikantejury	Vastelaoves-jury	SMS/Tillefoon	Totaal	Plaats
	In volgorde van optreeje:	Plaats	Jury 1	Jury 2	Jury 3	Jury 4	Jury 5	pnt	
11	Ich knap op en aaf!	Hölsberg							
12	Òs Bestaon	Venroj							
13	Allemaol	Zitterd							
14	Vasteloavos Samos	Heële							
15	Hange	Venroj							
16	De Voicemail	Zöstere							
17	33 Daag	Venlo							
18	'n Fluitje van 'ne sent	Lömmerig							
19	Laef, Limburg laef!	Mofert							

*Bij gelieke sjtand wurt gekeke nao de punte van de LVK-hoofjury

Ich knap op en aaf!

Refrein:

*Dao knap ich van op! Dao knap ich van op!
Van dae sjoane vastelaovend en dae kolder in de kop.
Dao knap ich van op! Dao knap ich van op!
Wie van sjpek-en-ei of bloodwoosj, of wie van ertesop.
Noe maak ich mit die daag 'n nuuj begin,
mit eine gekke sjlaag, goaj ich mich d'r in.
Dao knap ich van op! Dao knap ich van op!
Van dae sjoane vastelaovend en dae kolder in de kop.*

Van die luuj die ummer blieve lamentere,
doa knap ich op aaf!
En de positieve dinger neet waardere,
doa knap ich op aaf!
Meh gelukkig mer, ich bin dae'n optimis,
dae lekker op aan 't knappe is.

Van die luuj die zoerder zin es zoermoosvate,
doa knap ich op aaf!
Wo de bèste therapie neet bie zal bate,
doa knap ich op aaf!
Meh gelökkig mer, de meeste die ich kin,
die hóbbe altied gooje zin.

Van die luuj die nieks van vastelaovend sijnappe,
doa knap ich op aaf!
Die-s te noats 'ns op get humor kins betrappe,
doa knap ich op aaf!
Meh gelökkig mer, 't gros dat haet gein las,
die laeve drie daag veur de sjpas.

Oetveurende: **De Geliënde**

Teksdichter: *Maurice Pluijmakers*

Compenis: *Jos Gijzen*

Plaats: *Hölsberg*

LVK11




Òs Bestaon

Refrein:

Noeëts, nae, noeëts wil ik òw laote gaon.

Noeëts, nae, noeëts zulle weej dit aoverslaon.

*Noeëts, nae, noeëts zal dat gevuul nog aovergaon,
mit vastelaovend dan viere weej: òs bestaon.*



Ik wieët 't nog goed, dat geej daor zoeë stoond.
De kònfetti en de vlinders vlogé ien 't rond.
Aerm ien aerm, weej vuulde òs riek.
't is wér vastelaovend as ik nor òw kiek.
Dat gevuul is gebleve, we zien same wér hier.
Op presies datzelfde plekske as d'n allerurste kieër...

Ik zie 't nog vur meej, dén lách òp ow moond.
'k waar ziek van de kriebels már dat vuulde gezoond.
Gedânst en gezònge en geláche mit òw.
de mojste vastelaovend dén viere we nòw.
Dat gevuul is gebleve, we zien same wér hier.
Op presies datzelfde plekske as d'n allerurste kieër...

Oetveurende: ***Bjorn & Mieke***

Teksdichter: *Roel Gommans & Jules Reivers*

Compenis: *Roel Gommans & Jules Reivers*

Plaats: *Venroj*

LVK12



ALLEMAOL

Refrein:

Dus laot óg allemaol

Laot uch alleney èns effe heure

Allemaol

Maar dan geit 't heej ouk ech gebeure

Wieväöl gekke dialekte zeen hie waal?

Es al die tale in de zaal 't Limburgs kleure

Allemaol

Gaon weej same met dit leedje aan de haol

Ich wil ein leidje gaon brènge

mer zònger haajebaaj

Gaef mich 'ne vent dae kin zinge

en genne tadewaa

Ouch leever neit mit ein kraaktuut

of mit ein wauweltrien

Mer mit dich en mich

det zoel wat zien.

Wae wilt de buun op en knalle
met eine vètkedee?

Gaef mich ein meid die kènt sjalle
mer dan gein nienevee

Ouk leever neet zô'ne druuege
of eine kwazelaer

Aan 'm noe dao
gaon we same haer.

Biemermiete, iepekriete,
tuint uch alleney

Ozelaere, doedelaere,
zing maar met ós mei.

Gaon weej same met dit leedje,
Met de vastelaovend
dreej daag aan de haol!

Oetveurende: **Christel & Paul-Jean**

Teksdichter: *Thei Wessels*

Compenis: *Quinn Warmerdam*

Plaats: *Zitterd*

LVK13



Vasteloavos Samos

Refrein:

Hoppa, hoppa, hoppa
Is d'r Griekse Vasteloavos
Hoppa, hoppa, hoppa
Zoeë gemuutlig ónger ós
Hoppa, hoppa, hoppa
Mit d'r Griekse Vasteloavos
Hoppa, hoppa, hoppa
Is d'r Pappatotallos

Kyriakos d'r Griek
vingt d'r Vasteloavend sjiek
Zienge vrunk Dimitrios
Wool dat heë d'r get va Kos
Dionysos kriet zie offer
Aphrodite weëd ge-ierd
En 't fes va Vasteloavend
Weëd zoe óp zie Grieks gevierd

Zidder va hei? Nè, ich bin op boezoeki

Drek al bei d'r ieëstje Ouzo
Gont ze same oet d'r bol
Wilt me 'm da richtig Raki
Sjud me werm de glazer vol
Mit ee dreimoal kreftig "hoppa!"
Wurp me teld're aa gen eëd
Mè ee good gesjier i sjerne
Brink geluk, mè is nieks weëd

Gieëf-se nog inne? Nè, ich sjtoa Rhodos op d'r Gyros

't Maag da waal neet floepe
Mit d'r Euro en deë kroam
Mè d'r Griek wit wie te viere
Bis d'r allerletste oam

Oetveurende: ***Pavlos & Leonidas oet Heëllas***

Teksdichter: *Paul Münstermann & Leo Keularts*

Compenis: *Paul Münstermann*

Plaats: *Heële*

LVK14



Hange

Refrein :

*Went as dén tied blijft há-há-hángo
dan duurt dén aovend lá-lá-lánger.
Krieg van dit fieëstje noeëts genoeg,
weej blieve staon tot maerge vroeg.*

*Went as dén tied blijft há-há-hángo
dan duurt dén aovend lá-lá-lánger.
Göt de kepél már dur,
gón weej nog nie nor huus
en zien weej mit de vastelaovend noeëts mér thuus.*

Weej stón hier mit z'n alle,
De klok slöt elluf uur.
't moment dat vastelaovend
nie láng genoeg mér duurt
De daage zien te kort dan,
wie wet daor nog wat vur?
As d'n tied kòs blieve hángo,
gònge weej vur ieëweg dur.

Niemes is te vroeg dan
en gén meens is mér te laat.
Went zette weej de klok uut,
dan stöt iedereën paraat.
Ge hoeft nie mér te waachte
en ge het noeëts wat gemist
pas as de wiezers blieve hángo
wieëte weej hoe laat 't is.

Ech waor, Ech waor,
Heej, ik, gillie, geej,
Weej zien d'r ech vur klaor

Oetveurende: **De Stappers**

Teksdichter: *Leon Aarts*

Compenis: *Roel Gommans & Jules Reivers*

Plaats: *Venroj*

LVK15



De Voicemail

Refrein :

*Hey, hoi, hallo, 't is hiej mit mich
Ich vier noe Carnaval en daorum dit berich.
Omdet ich trêk hiej door de sjtraote
Höb ich det dêngk mer oetgelaote.
Einde berich, ich sjloet noe aaf.
Laot get achter nao de piep, Alaaf!*

Doe hêls het neet mieë taeg, mós mitdoon mit de res
Auch vastelaovend vierse noe mit smartfoon oppe tes
Mien vrouw zag: "Doe löps achter sjat, wêtse waat ich doon
Ich koup dich veur de Carnaval 'ne sjlumme tillefoon"
weer zeen noe verbónje daag en nach
Mer aan ein dêngk hauw zie neet gedach
Want es zie drök 06 veer maol de 11
Den huért zie dök dit bèndje van michzelf

Vastelaovend laat de batterie haos laeg ocher
De tillefoon dae geit, ich zeen mien maedje op het sjerm
Ich zegk nog: "Hauwt het kort sjat, mien sjtreepkas zeen wuud op"
Mer ja, zoa is mien vrouw, es die begint kump die neet sjtop
Te laat, mie lempke det geit oet
Ich zeen dae blik al veur mich op häör sjoet
Zie drök opnuuj 06 veer maol de 11
En huért kerdju, weer det bèndje van michzelf

De mood inne sjoon
Waat moos ich noe doon
Het zijweit al oppe kop
Mer gauw nao d'n tap
Dao liënde ich rap
zónne klómmel mit nog sjtreepkas drop
Ich drök 06 ach maol de 7
en ich huér dit berich van miene leve

Hey, hoi, hallo, 't is hiej mit mich
Doe viers noe Carnaval, en daorum dit berich
Omdes doe trêks dao door die sjtraote
Höb ich os hoes alvas gesjlaote
Einde berich ich lêgk noe neer,
ich pak neet op esse nog bels, vää! plezeer

Oetveurende: **Spik en Span**

Teksdichter: *Niek Dirkx,
Jan van Wegberg
Jos Wackers*

Compenis: *Jo Huijnen & Niek Dirkx*

Plaats: *Zöstere*

LVK16



33 Daag

Refrein:

Ik heb al 33 daag de vastelaovend in de kop

En det duit pien

Det duit zôn pien

Ik bin zoë bang det alles veurdet 't begint al is gestop

Det zoel waat zien

Det zoel waat zien

Vruuger waas 't nog in dreej daag te behappe

Maar op vandaag mósse vanaaf kersaovend

Waeke op de lappe

Drek is alle joeksigheid al op!

Ik heb al 33 daag

Ein stök in miene kraag

En de vastelaovend in de kop

Dan waer ik 's morges wakker

Dan zit ik vol met joeks

Dan veul ik det daen dagelikse

sleur wuurt weggeboekse

Dan kôs ik eeder muulke

En zing zoë wie belaoef

'Hallo, hallo, 't is weer...'

maar waat zeen ik in d'n haaf?

De kersbaum steit d'r nog,

de lempkes brande, ôch,

ik wil de gansen tiéd al
maar 't is nog neet zoë wiéd

Dan bin ik 'nt studeere
Dan liér ik weer waat slums
Maar wie ik auk probeer d'r pas heej
niks mier in d'n bums
Daen bums zit vol met leedjes
Met lol en met plezeer
Ik goëj mien beuk d'n haard in
en ik zing: 'Wao gaon we haer?'
Maar baove klink gekraak,
d'n huijbaard op 't daak,
Ik wil de gansen tiéd al
maar 't is nog neet zoë wiéd!

Volgend jaor dan velt de vastelaovend lekker laat
Dan zit d'r nao die dreejendertig daag inens ein gaat
Ein gaat det ik môt völle, anders geit 't strakkes mis!
Dus doon ik elf daag asof 't vastelaovend is

Oetveurende: **Bram & Ruud**

Teksdichter: *Frans Pollux*

Compenis: *Frans Pollux*

Plaats: *Venlo*

LVK17



'n Fluitje van 'ne sent

Refrein:

*Al höb' ver niks meer in ôs tesje ...
al höb' ver niks meer oppe nãöd..
Dan koup' ver van de laege flesje
nog get wat rammelt bie die trãöt.
Veer vawwe ôs van aw gezette
d'n allersjoonste hood ...
En dan môste 'ns d'r op lette
vastelaovend wurd weer good*

Al zin ver sjtraks auch blut
veer blieve ech neet in de hut.
Ver blieve altied vastelaovend viere
waodoor me alle zörg vergut.
Veer kroepe ech neet in de sjölp
't is de sjpas toch ôs hölp.
En este heurs "räötäötäötäöt .."
is dat ôs zelfgemaakde trãöt.

'n Sjieke trãöt is op vendaag
toch 'n gigantisch groot bedraag.
Die trãöt die maak ver daarom zelf waal
dao gaon ver gaer met aan de sjlaag.
't Is zo sumpel es mer get
doe geis geweun op internet.
En kieks op " GOOGLE " of " YAHOO "
wie maak ich zelf ' ne KArtoeZOO

Es 't 'ns aeve neet wilt flotte
gaef dan de sjpas de vrieje loup.
Dat hoof dich ech gein geldj te koste
want plezeer is neet te koup ...
Limbricht

't Is ein en al amuzement
en 't is 'n fluitje van 'ne sent

Oetveurende: **Kartoesj**

Teksdichter: *Guus Steinen*

Compenis: *Guus Steinen*

Plaats: *Lömmerig*

LVK18



Laef, Limburg laef!

Refrein:

Laef, laef, Limburg laef!

Riet de kas mer aop en haol de pekskes droet

Laef, laef, Limburg laef!

Boew de wages aaf en roop de prinse oet

Laef, laef, Limburg laef!

Blaos de hoempapa weer de waereld in

Vier 't neet allein, vier mit ederein

Vier 't óngerein, vier mit groeat en klein

Vier 't naevenein, vier 't achterein

Laef, laef, Limburg laef!

Laef, laef, Limburg laef!

Hie in oos bourgondisch lendje,

in 't brónsgreun eikehout

Is eder jaor ein fieës,

det is al lang bekroeandj mit goud

't-Is veur ós 't allerhoogste

waat 't guuef op dizzen aerd

't Hètj hie vastelaovendj

en det is ós alles waerd

Kónfetti en serpentines,
vlege hie drie daag dore lóch

Det mink zich mit meziek,

daovan höbbe veer genóg

Doog daobie 'n sjeutje gekkigheid

en eine flinke hampel spas

'nne Klódder bóntje kluuere,

'n porsie joeks en snap uch vas

Oze nachtegaal brultj vanne spas

Oze lieëw dae zink voloet

Zellefs die twieë loupe oet de pas

Blaoze same op die toet

Lalalalalalalalalala

Oetveurende: **La Bamba**
Tekstdichter: *Ron Roemen*
Compenis: *Ron Roemen*
Plaats: *Mofert*

LVK19



VAAN EYSDE TOT DE MOOKERHEI

HET GROTE LVK BOEK



BESCHREVEN HISTORIE VAN HET LVK - 35 WINNAARS
HISTORISCH MATERIAAL - MEER DAN 300 PRACHTIGE
FOTO'S - MUSTHAVE VOOR ELKE VASTELAOVESVIERDER!

"Vaan Eysde tot de Mookerhei" is een uitgave van L1 en RedFrock Publishing in samenwerking met Stichting LVK



L1mburg live





Vrunj L V K

Buro Pro Gelaen

Lily's Vakantiehuisen

Ludiek Sjiek

Schrijen-Lippertz

EBM-Security

Pyramid

Laco-Glanerbrook, Gelaen
Café-Zaal 't Kesjotje, Zjwame
Pretcafé de Beurs, Hoars



Publieksjtumme per SMS of tillefoon

Auch geer kint mitbepale wae 't LVK-2013 geit winne.

De publieksjtumme tèlle veur 1/5e deil mit in de eindoetsjlaag.
Geer kint mètdoon door ein sms te sjikke of te belle.

SMS € 0,70 per sms		SMS nao 4422
01 Ik bin vastelaovend	Blierik	LVK01
02 De Vastelaovesheld	Stein	LVK02
03 Eh?... Lalala	Rooj	LVK03
04 Ik bin genne boer	Velde	LVK04
05 Dao bun ich met gebaore	Hale	LVK05
06 In de Wolke	Kepel	LVK06
07 Hòbs doe ouch zo'ne zin	Zitterd	LVK07
08 't Verlange	Wieërt	LVK08
09 Pappa Mamma	Haors	LVK09
10 Murge blief ich Thoes	Naer	LVK10
Telefoon € 0,70 per gesprek	0909 – 202 70 30	

Publieksjtumme per SMS of tillefoon

Auch geer kint mitbepale wae 't LVK-2013 geit winne.

De publieksjtumme tèlle veur 1/5e deil mit in de eindoetsjlaag.

Geer kint mètdoon door ein sms te sjikke of te belle.

SMS € 0,70 per sms		SMS nao 4422
11 Ich knap op en aaf!	Hölsberg	LVK11
12 Òs Bestaon	Venroj	LVK12
13 Allemaol	Zitterd	LVK13
14 Vasteloavos Samos	Heële	LVK14
15 Hange	Venroj	LVK15
16 De Voicemail	Zöstere	LVK16
17 33 Daag	Venlo	LVK17
18 'n fluitje van 'ne sent	Lömmerig	LVK18
19 Laef, Limburg laef!	Mofert	LVK19
Telefoon € 0,70 per gesprek	0909 – 202 70 30	

Euverzich winnaars 't Limburgs Vastelaovesleedjes Konkoer

JAOR	HERKOMS	TITEL	COMPENIS	TEKSDICHTER
1977	Mestreech	Vaan Eysde tot de Mokerhei	J. Innemee	B.Salden
1978	De Ruiver	De zaagte geej	J.Theelen	A.Wassen
1979	Gelaen	Dan kal ich plat	B.Erkens/T.Arts	B.Werkens/T.Arts
1980	Zitterd	De beierheering	H.Wijnands	H.Wijnands
1981	Remunj	De vastelaovend heurt bie Limburg	N.Reijners	N.Reijners
1982	Göttekaove	Zoa moosj 't kenne blieve	G.Steinen/G.Wauben	G.Steinen/G.Wauben
1983	Gelaen	Mie Limburgs blood	B.Erkens	M.Zijlstra-de Loo
1984	Meersje	Doa moste mèt ljière léve	L.Volders	L.Volders
1985	Gelaen	Hawt 'm vas de vastelaovend	Bert Dijcks	J.Ridderbeekx
1986	Mestreech	Jao heij in Limburg	J.Duchateau	J.Duchateau
1987	Lin	Wiebölle	J.Evers	P.Evers
1988	Venlo	Minse wie weej	G.Aerts	F.Boermans
1989	Venlo	De knappe(rikke)	F.Boermans/G.Aerts	F.Boermans/G.Aerts
1990	Gelaen	Ich tik neet richtig	B.Erkens	M.Zijlstra-de Loo
1991	Venlo	Det is ein joekskepel op joets	J.Jacobs	S.Maaskant
1992	Venlo	Waat hebbe we 't toch good	F.Boermans/G.Aerts	F.Boermans/G.Aerts
1993	Tegele	'nne Late	P.van den Akker	P.van den Akker
1994	Venlo	Heej of dao	G.Aerts	G.Aerts

OETVEURENDE**FINALEPLAATS**

The Walkers Gelaen

Lei Driessen Gelaen

B.Erkens Gelaen

P.Eijkenboom Gelaen

N.Reijners/D.Reijners Gelaen

De Zjweitvuit Gelaen

Roed is Droof Gelaen

Leon Volders Remunj

Jan Ridderbeekx Heëlehei

Beppie Kraft Gelaen

Duo twee plus Gelaen

De Kammeräodjes Gelaen

W.Vestjens en H.Cromvoets Gelaen

Ben Erkens en zien maedjes Gelaen

Hay en Paul Peeters Gulpe

W.Vestjens en H.Crompvoets Lin

Thei & Marij Tegele

W.Vestjens en H.Cromvoets Baek

1990
Ben Erkens
Miets Zijlstra



JAOR	HERKOMS	TITEL	COMPENIS	Teksdichter
1995	Haors	De ganse santekraam	T.Kleeven	C.Kuipers
1996	Mestreech	Drejje!!	U.& B.Garnier	U.& B.Garnier
1997	Venlo	Had ik maar	J.Gubbels	F.Boermans
1998	Ulesjtraote	Opzie, Opzie, Opzie	G.Jacobs	G.Jacobs
1999	Mestreech	Iech höb diech weer gevoonde	Bert & Ursula	U.& B.Garnier
2000	Venlo	Josefien	W.Roeffen	Roeffen/Boermans
2001	De Ruiver	Good geammezeerd	A.Wassen	A.Wassen
2002	Gulpe	Wie d'r Herrgot Limburg had gemaakt	Ben Erkens	Ben Erkens
2003	Venlo	Dèh dan, dao isse	Peter Jansen	P.Jansen & W.Janssen
2004	Heële	Tweemaol aafgezeëg(en nog te kót)	Munstermann/Keularts	Munstermann/Keularts
2005	Bor	Wat zaeter?!	Ben Erkens	Heffels/Dullens/Erkens
2006	Lömmerich	Dat zit bie os in de familie	Guus Stienen	Guus Stienen
2007	Grevors	Heej bliëf ik plekke	Rene Verschueren	Rene Verschueren
2008	Venlo	De kriebels	Frans Pollux	Frans Pollux
2009	Grevors	Ni miër en ni minder	Rene Verschueren	Rene Verschueren
2010	Venlo	Vandaag!	Quinn Warmerdam	Quinn Warmerdam
2011	Venlo	Kôm 's kiëke beej ôs	Quinn Warmerdam	Hannelore Winter
2012	Venlo	Doot 's gek	Quinn Warmerdam	Quinn Warmerdam
2013		???		

OETVEURENDE

de Wazelvotte

Duo Ammezasje

W.Vestjens & H.Crompvoets

Gaston en zien vrunj

't Merretkoer

W.Vestjens en G.Deenen

Dét mô't kènne

Frans Croonenberg

P.Jansen & W.Janssen

Paul en Leo

Böshuuske Ontsjpannings Ver.

Kartoesj

De Toddezek

Bram & Ruud

De Toddezek

W-dreej

W-dreej

W-dreej

FINALEPLAATS

Roggel

Haors

Gelaen

Wieërt

Belvend

Kirchrao

Neel

Blierick

Zitterd

Sint Odiliën Berg

Venray

Stein

Neel

Serum

Gelaen

Thoeat

Panningen

Mergraote

???

**de Bertha-Paulissen Baeker***foto: RedFrock Publishing*

Index

Limburgs Volkslied
 Veurwoord veurzitter LVK
 Veurwoord veurzitter Stichting LVK-2013
 W-Dreej (winnaar 2012)



	pag		pag
2	1	Ik bin vastelaovend	10
4	2	De Vastelaovesheld	12
6	3	Eh?... Lalala	14
8	4	Ik bin genne boer	16
	5	Dao bun ich met gebaore	18
	6	In de Wolke	20
	7	Höbs doe ouch zo'ne zin	22
	8	't Verlange	24
	9	Pappa Mamma	26
	10	Murge blief ich Thoes	28
		Score-formulier Finale	30-31
	11	Ich knap op en aaf!	32
	12	Ôs Bestaon	34
	13	Allemaol	36
	14	Vasteloavos Samos	38
	15	Hange	40
	16	De Voicemail	42
	17	33 Daag	44
	18	'n fluitje van 'ne sent	46
	19	Laef, Limburg laef!	48
		Mit sjtumme euverzich	54-55
		Historie euverzich	56-59

Pès anger jaor op vriedig 14 fibberwari 2014!

Mit dank aan óse sjponsors! V.V. De Hopsjlokkers Zjwame



Rabobank



studiodone

DTP- en Ontwerpstudio Nikkessen ■ www.studiodone.nl

Consider it done!



Rijksweg Zuid 14 Swalmen
Tel: (0475) 501505

Mit dank aan óse hoofsjponsors! www.stichtinglvk.nl



new energy systems



De Limburger DAGBLAD
Limburgs Dagblad

GULPENER



OP DE TOEKOMST!

Volta Limburg
Warm en zeker



VeTraNed

Uw veiligheid is onze zorg

